

aliqui ex discipulis offensi, ab ipso recedunt, Apostoli in fide permanent, & Petrus ait Verba esse vitæ æternæ. Et nos (inquit) credidimus, & cognovimus, quia tu es Christus Filius Dei. Ibid. à vers. 26. ad 30.

*I. C. dum remanet in Galilæa, Scribæ & Pharisei queruntur pro variis traditionibus, quas discipuli Iesu negligunt.*

LXXVII. Posthæc ambulabat Iesus in Galilæam, non enim volebat in Iudæam ambulare, quia quærebant eum Iudæi interficere, Ioan. 7. vers. 1. Tunc accesserunt ad eum à Ierosolymis quidam Scribæ & Pharisei: qui cum vidissent quosdam ex discipulis Iesu non lotis manibus manducare Panes, queruntur, id esse contra traditiones Seniorum, respondet Iesus, Phariseos ipsos hypocritas esse, qui traditiones humanas potius quam Dei mandata observent. Ex Matth. 15. vers. 1... & seq. Marc. 7. vers. 1. & seq.

*I. C. Exit in partes Tyri, & Sidonis: ubi Chananææ precibus victus, ejus filiam absentem, & spiritum immundum habentem, verbo sanat.*

LXXVIII. Et egressus inde Iesus, secessit in partes Tyri, & Sidonis. Ecce mulier Chananæa à finibus illis egressa, clamavit, dicens ei: Miserere mei Domine, Fili David, Filia mea malè à dæmonio vexatur, qui non respondens ei, illa semel, iterumque & tertio submississimè eum precata, seque canibus etiam de mensa Domini micæ colligentibus comparans, Tunc respondit Iesus: O mulier, magna est fides tua, fiat tibi sicut vis. Et sanata est filia ejus ex illa hora: & cum (mulier Chananæa) abiisset in domum suam, invenit puellam jacentem supra lectum & dæmonium exiisse. Ex Matth. 15. vs. 21... 28. Marc. 7. vs. 24... 30.

*I. C. redit ad Mare Galilææ, ubi surdum, & mutum curat.*

LXXIX. Exiens de finibus Tyri, venit per Sidonem ad mare Galilææ per medios fines Decapoleos: & adducunt ei surdum & mutum, & deprecabantur Iesum, ut imponat illi manum. Et apprehendens eum seorsum misit digitos suos in aurículas ejus, & expuens tetigit linguam ejus. Et statim apertæ sunt aures ejus, & solutum est vinculum linguæ ejus, & loquebatur rectè. Marc. 7. vers. 31... 35.

*I. C. ascendit in montem, plurimos curat, & è panibus septem, & paucis pisciculis quatuor hominum millia saturat.*

LXXX. Et ascendens in montem sedebat ibi, & accesserunt ad eum turba multæ, & habentes secum mutos, cæcos, claudos, debiles, & alios multos: Et projecerunt eos ad pedes ejus, & curavit eos, ita ut turba mirarentur, videntes mutos loquentes, claudos ambulantes, cæcos videntes, & magnifica-

bant Deum Israël: & cum turba multa esset, nec haberent quod manducarent, convocatis discipulis, ait illis: Misereor turbæ, quia triduo jam perseverant mecum, & non habent quod manducant, & si dimiserò eos deficient in via. Discipulis autem se habere tantum panes septem, & paucos pisciculos dicentibus, præcepit, ut turbæ discumberent super terram: & accipiens septem panes, & pisces, gratias agens fregit, & dedit Discipulis suis, ut apponerent turbæ, & comederunt omnes, & saturati sunt, & quod superfuit de fragmentis sustulerunt septem sportas plenas. Erant autem qui manducaverant, quasi quatuor millia hominum, & dimisit eos. Matth. 15. vers. 32... 38. Marc. 8. vers. 1... 8.

*I. C. navigat in fines Magedan, & Dalmanutha, ubi Pharisei iterum signum petunt è cælo.*

Et dimissa turba ascendit in naviculam cum discipulis, & venit in fines Magedan, & Dalmanutha Matth. 15. vers. 39. & accesserunt ad eum Pharisei & Sadducei, & rogaverunt eum, ut Signum de cælo ostenderet eis. Generatio mala, & adultera signum querit (inquit Iesus) & signum non dabitur ei, nisi signum Ionæ Prophetæ, & relictis illis abiit. Matth. 16. vers. 1... 4. Marc. 8. vers. 10. 12.

*I. C. transfretat mare Galilææ, monetque discipulos, ut caveant à fermento Phariseorum & Sadducæorum, & Herodis.*

Ascendit iterum navem (Iesus) & abiit transfretum, & obliti sunt (discipuli) panes sumere, & nisi unum panem non habebant in navi, qui dixit illis: Cavete à fermento Phariseorum, & Sadducæorum, & Herodis. Per fermentum hoc non panem ad manducandum se intelligere dicit Iesus, qui antea ex quinque panibus, & duobus piscibus hominum quinque millia, & qui ex septem aliis panibus, & paucis pisciculis alia quatuor hominum millia saturavit. Sed hypocrisim & perversam doctrinam Phariseorum & Sadducæorum, & Herodis. Matth. 16. vers. 5... 12. Marc. 8. vers. 8. 21.

*I. C. petit Bethsaidam, ubi cæcum illuminat.*

Et veniunt Bethsaidam, & adducunt ei cæcum, & rogabant ut illum tangeret: & apprehensa manu cæci, eduxit eum extra vicum, & expuens in oculos ejus, impositis manibus suis interrogavit eum, si quid videret... iterum imposuit manus super oculos ejus... & restitutus est ita ut clarè videret omnia, & misit illum in domum suam. Marc. 8. vers. 22. 26.

*I. C. venit in partes Cæsareæ, ubi Petro Christum esse Filium Dei confitenti, pollicetur se ei daturum claves regni cælorum.*

Et egressus Iesus, venit & discipuli ejus